

EDWARDS (TEULU), Cilhendre a Plas Yolyn, Sir Amwythig.

Yr oedd y teulu goror hwn yn hawlio eu bod yn disgyn o Iddon ap Rhys Sais Cilhendre, a briododd ferch Sir John Done, yntau hefyd yn sylfaenydd teulu [Myddelton](#) a theulu [John Jones](#) 'y brenin-laddwr'. Mabwysiadwyd y cyfenw yn gynnar yn yr 16eg ganrif eithr ni ddaeth y teulu i amlygrwydd hyd yr 17eg ganrif - ym mherson THOMAS EDWARDS (1592 - 1667), Cilhendre a Plas Yolyn, cyfaill mynwesol yr ail [Syr Thomas Myddelton](#). Yr oedd ef yn un o'r cenhadon sifil y rhoddwyd awdurod iddynt gan [Thomas Mytton](#) i drefnu telerau darostwng sir Fôn (Mai - Mehefin 1646) a Harlech (16 Mawrth 1647); daeth yn rheolwr Wrecsam yn 1647. (Cyfyrdar iddo, y mae'n fwy na thebyg, ydoedd y Thomas Edwards, Amwythig, a oedd yn siryf swydd Amwythig yn 1644 ac a wnaethpwyd yn farwnig yn 1645 - gweler [J. R. Phillips](#), *Civil War*, ii, 43, G.E.C., *Baronetage*, ii, 243.) Parhaodd Thomas Edwards yn gyfeillgar â'i gyd-gennad [John Jones](#) 'y brenin-laddwr,' a phriododd ei fab, THOMAS EDWARDS, M.D. (bu farw 1668), nith [John Jones](#), sef merch Watkin Kyffin, cynrychiolydd [Syr Thomas Myddelton](#) ar ystad Castell y Waun. Dywed traddodiad i [Jones](#) fod yn aros yn Cilhendre ym mis Mai 1660 cyn dychwelyd i Lundain i wynebu ei dynged; mewn blynyddoedd diweddarach ymwelai ei fab John â'i gyfnither (a oedd bellach yn weddw) yn Cilhendre; cymerodd brydles ar y t yn 1688 a bu farw yno c. 1717. Priododd Judith, merch ac aeres Thomas Edwards, JOHN MORRALL, Plas Yolyn, a buont hwy a'u disgynyddion yn byw yn Plas Yolyn - tynasid Cilhendre i lawr yn 1794. Daeth papurau a dogfennau'r teulu i'r Llyfrgell Genedlaethol yn 1937.

Awdur

Yr Athro Emeritus Arthur Herbert Dodd, (1891 - 1975)

Ffynonellau

History of the Princes, the Lords Marcher, and the Ancient Nobility of Powys Fadog, iv, 88-90

Archifau LIGC: [Plas Yolyn Estate Records and Manuscripts](#)

W. M. Myddelton, *Chirk Castle Accounts, A.D. 1605-1666* (St. Albans 1908), 34, 68, 127

Calendar of Wynn (of Gwydir) Papers, 1515-1690, in the National Library of Wales and elsewhere, 1774, 1777-9, 1782, 1797-1801

Calendar of the Committee for Compounding with Delinquents, etc., 1643-1660, i, 205

John Roland Phillips, *Memoirs of the Civil War in Wales and the Marches, 1642-1649* (London 1874), ii, 42-3, 307-8, 312-3, 332-3

A. N. Palmer, *A history of the older nonconformity of Wrexham and its neighbourhood being the third part of 'A history of the town and parish of Wrexham'* (1888), 7-8

Trafodion Anrhydeddus Gymdeithas y Cymmrodorion, 1948, 253-70

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

